

खबरां

- सोमनाथ मंदर दी स्थाई भावना गी मनांदे होई गुजरात दे प्रभास पाटन च चार दिनें दा सोमनाथ स्वाभिमान पर्व शुरू होई गेआ।
- प्रधानमंत्री नरेंद्र मोदी होरें आखेआ जे भारत दी सभ्यता संकल्प नै सोमनाथ दे पुर्ननिर्माण गी समें रौहंदे पक्का कीता ऐ।
- सरकारी नौकरी घोटाले दे सिलसिले च प्रवर्तन निदेशालय नै 6 राज्यें दे 15 थाहें पर छापेमारी कीती।
- मोगन स्टेनले दा आखना ऐ जे भारत दी अर्थ बवस्था च मौजूदा वित्तीय ब'रे च 7.6 फीसद दी बढोत्तरी दी मेद ऐ, जेहडी सरकार दे 7.4 फीसदी अनुमान शा मती ऐ।
- अमरीका नै संयुक्त राष्ट्र दी जनसंख्या एजेंसी सने केइयें अंतरराष्ट्री संगठनें थमां अपने आप गी बाहर कड़ी लैता ऐ।
- बैडमिंटन च पी.वी सिंधू होर कुआलमपुर च मलेशिया ओपन दे वुमन्स सिंगल्स दे क्वार्टर फाइनल च दाखल होई गेइयां ना।

<><><><><><>

Somnath Swabhiman Parb

गुजरात दे तटीय कस्बे प्रभास पाटन च सोमनाथ मंदर दी भावना गी मनांदे होई चार दिनें दा सोमनाथ स्वाभिमान पर्व अज्जै थमां शुरू होई गेआ। एह पर्व 1026 ई. च महमूद गजनी आसेआ सोमनाथ मंदर पर पैहले हमले दे इक जहार ब'रे पूरे होने उप्पर कीता जा करदा ऐ। इस ब'रे 1951 च सोमनाथ मंदर दे परतियै जीर्णोद्धार दे 75 बरे यानि 75मीं बरेगंड बी ऐ। इस पर्व दी शुरूआत उप्पर पैहले ज्योर्तिलिंग च 72 घंटे लगातार अखंड ओंकार जाप कन्नै होई। केंद्री मंत्री गजेन्द्र सिंह शेखावत होरें राज्यमंत्री जीतू वाधानी ते डॉ. प्रद्युमन भाई वाजा हुं'दे कन्नै मिलियै समारोह च पारम्परिक शंखनाद कीता। पूरे गुजरात चा तकरीबन 2500 ऋशि कुमार समुंदर दे किनारे कट्टे होइयै लगातार वैदिक मंत्रें दा लगातार जाप कीता। प्रधानमंत्री नरेंद्र मोदी होरें पूरे देसै गी सोमनाथ स्वाभिमान पर्व दी बधाई दिती ऐ।

<><><><><><>

PM Somnath-Swabhimaan Parv

प्रधानमंत्री नरेंद्र मोदी होरें आखेआ ऐ जे भारत दे सभ्यता संकल्प नै सोमनाथ दे पुर्ननिर्माण गी समें रौहंदे पक्का कीता। उनें आखेआ जे इस दिन गी मनाने दा मकसद उनें अनगिनत भारती बच्चें गी सम्मान देना ऐ जिनें अपने उसूलें कन्नै कदें बी समझौता नेई कीता। इक सोशल मीडिया पोस्ट च मोदी होरें आखेआ जे जनवरी 1026 च सोमनाथ पर पहला हमला होआ हा। लगातार हमलें दे बावजूद श्रद्धालुएं दी अडिग आस्था ते भारत दे सभ्यता संकल्प दे चलदे सोमनाथ दा दोबारा निर्माण हुंदा गेआ।

<><><><><><>

Young leader Dialouge

विकसित भारत युवा नेता संवाद यानि विकसित भारत यंग लीडर डायलाग कल नमीं दिल्ली दे भारत मंडपम च होग। मीडिया आहलें कन्नै गल्लबात करदे होई युवा मामलें ते खेडू मंत्री डॉ. मनसुख मांडविया होरें आखेआ जे 4 दिनें दे इस कार्यक्रम दरान देसै दे बक्ख-बक्ख युवा नेता कट्टे होइयै विकसित भारत बारै अपने विचार प्रधानमंत्री नरेंद्र मोदी हुंदे समाने पेश करंगन।

<><><><><><>

Illegal Foreign National

दिल्ली पुलिस नै 548 विदेशी नागरिकें दी पंछान कीती ऐ जेहडे पिछले इक बरे थमां गैर कनूनी ढंगे कन्नै राश्ट्री राजधानी च बिना वैध वीजा दे रवा करदे हें डिप्टी कमिशनर ऑफ पुलिस आउटर डिस्ट्रिक्ट सचिन शर्मा होरें दस्सेआ जे गिरफ्तारी दे बाद बिदेशी नागरिकें गी विदेशियें दे क्षेत्रीय पंजीकरण दफ्तर च पेश कीता गेआ ते एहदे मगरा उनेंगी डिटेंशन सेंटर च डिपार्टेशन प्रक्रिया लेई भेजी दित्ता गेआ। उनें आखेआ जे सारें कोलां मती गिनतरी बंगलादेशियें दी ऐ जेदी संख्या 380 ऐ।

<><><><><><>

PRAGATI

साबका काबिना सचिव ते नीति आयोग दे सदस्य राजीव गौबा होरें आखेआ ऐ जे प्रगति नै देश च ढांचागत परियोजनाएं दे कम्म गी नमी रफ्तार दित्ती ऐ। आकाशवाणी कन्नै इक खास साक्षात्कार च गौबा होरें दस्सेआ जे किश परियोजनाएं गी प्रगति हेठ समीखा आस्तै आपूं प्रधानमंत्री होरें चुनेआ हा। एह साक्षात्कार अज्ज राती साड्डे 9 बजे 100.1 आकाशवाणी एफ.एम गोल्ड चैनल पर ते अतिरिक्त फ्रिक्वेंसीज पर सुनी सकदे हो।

<><><><><><>

Govt. Fake Job Scam

प्रवर्तन निदेशालय इक संगठित गरोह दे खलाफ फर्जी सरकारी नौकरी घोटाले बारै पूरे देसै च अभियान तलाशी करा'रदी ऐ। एजेसी नै दस्सेआ जे शुरूआत च इस घोटाले दा पता भारती रेलवे दे नां पर लगगेआ हा पर जांच च पता लगगेआ ऐ जे इस च 40 शा मते होर सरकारी संगठन ते मैहकमें शामिल ना। 6 राज्यें दे 13 शैहरें च 15 थाहरें पर पर तपाशी जारी ऐ। एहदे च बिहार दे मुजफ्फरपुर ते मोतिहारी, पच्छिम बंगाल च कोलकाता, केरल च एरनाकुलम, पंडलम, अदूर ते कोदूर, तमलिनाडू च चेन्नई, गुजरात च राजकोट ते उत्तर प्रदेश च गोरखपुर इलाहाबाद ते लखनउ शामिल ना। ई.डी नै दस्सेआ ऐ जे गिरोह नै फर्जी ईमेल खातें दा इस्तेमाल कीता ऐ।

<><><><><><>

NSO ECO Growth

भारत दी आर्थिक तरक्की नेशनल स्टैटिस्टिकल आफिस दे पैहले अग्रिम अनुमान थमां बी मती होने दी मेद ऐ जेहडा नीतिगत गति दी अगुवाई च पिछले बरे सितंबर थमां लेइयै अज्जै तगर उच्चि आवृति आहले उछाल आहले आंकडे गी दर्शादा ऐ। मॉर्गन स्टेनले दी इक रिपोर्ट च वित्तीय बरे 2026 लेई असली जीडीपी दी बढ़ोबदी दा अनुमान 7.6 फीसद कीता गेआ ऐ जेहडा एनएसओ दे पैहले अग्रिम

अनुमान थमां मता ऐ जेदे च मौजूदा वित्तीय बरे च असली जीडीपी दी बहोबद्दी दा 7.4 फीसद दा अनुमान लाया गेआ ऐ।

<><><><><><>

BNP

बांग्लादेशी नेशनलिस्ट पार्टी दे सहयोगी संगठन दे वरिष्ठ नेता दी गोली मारिए हत्या करी दित्ती गई ते इक दुआ जना होर घटना च घायल होई गेआ। एह हादसा जंदी राती ढाका दे तेजगांव क्षेत्र च होआ जेदे कन्नै देश च कनून बवस्था दी बिगड़ी हालत दा पता लगदा ऐ। इस घटना दे मगरा बरोध प्रदर्शनें जोर फगड़ी लैता ऐ जिसी करी पुलस ते सेना दी खरी मती तैनाती कीती गई ऐ।

<><><><><><>

Billawar-Encounter

कठुआ जिले दे जंगली इलाके च सुरक्षाबले आतंकवादिएं दी धरफगड़ लेई तपाशी अभियान इक बारी परतिए शुरू कीता। इस दरान इक सुरक्षाकर्मी ममूली तौर पर जखमी बी होई गेआ। आकाशवाणी जम्मू संवाददाता दी रिपोर्ट मुजब सुरक्षाबले दे कारवाइएं सरबन्धी विशेश समूह ते होरनें सुरक्षाबले आसेआ बिलावर दे कहोग इलाके च सांझी कार्रवाई शुरू कीती गई। एह तपाशी कार्रवाई मगरा टाकरे च तब्दील होई गई। धानू परोल कमाध नाला आहले इलाके च तपाशी कीती जा'रदी ऐ।

<><><><><><>

CASO

राजौरी जिले दी थन्नामंडी इलाके दे कोट बहरोट ते कल्लर थाह एस.ओ.जी राजौरी ते सेना आसेआ इलाके दी घेराबंदी करिए तपाशी अभियान चलाया गेआ। तपाशी अभियान दरान सुरक्षाबले अप्पर बहरोट आहले जंगली इलाके थमां इक आई.ई.डी बरामद कीती गई। इस आई.ई.डी गी मगरा सेना आसेआ मौके पर गै नकारा बनाई दित्ता गेआ। इस दरान गोलीबारी दी कोई खबर नेई ऐ।

<><><><><><>

DMK-NDA

तमिल नाडू च इक महत्वपूर्ण राजनीतिक उथल-पुथल दे चलदे डी.एम.के संस्थापक डॉ. एस रामादोस होरें अपने पुत्र डॉ. अंबूमनी रामादोस दे उस दावे गी खारिज करी दित्ता ऐ जेदे च मेद जताई गेदी ही जे PMK, AIADMK गठबंधन कन्नै आने आहले विधानसभा चुनाएं आस्तै हत्थ मिलाग। अज्ज जारी इक बयान दे मताबक डॉ. रामादोस होरें आखेआ जे सिर्फ पार्टी संस्थापक गै चुनावी गठबंधन बारै फैसला लेई सकदा ऐ ते अपने पुत्र बक्खिया कीती गेदी घोशणा गी खारिज कीता। उनें आखेआ जे कोई बी राजनीतिक दल डीएमके कन्नै इस मौके गठजोड़ दा दावा नेई करी सकदा।

<><><><><><>

US-Withdrawal

अमरीकी राष्ट्रपति डोनाल्ड ट्रम्प होरें संयुक्त राष्ट्र दी जनसंख्या एजेंसी समेत केइएं दर्जनां, भर अंतरराष्ट्री संगठनें थमां अमरीका गी बाहर कड़ी लैता ऐ। ट्रम्प होरें कल 66 संगठनें, एजेंसिएं ते आयोग गी दित्ते जा'रदे अमरीकी समर्थन गी रोकी दित्ता ऐ। अमरीकी गृह विभाग नै अपने इक बयान

च आखेआ जे प्रशासन एह समझदा ऐ जे इनें इदारेनं दा प्रबंधन बडा माडा ऐ। एह जरूरी नेई ऐन ते एह उन्दे हितें लेई कम्म करदे न जेडे अमरीकी प्राथमिकताएं कन्नै बादू वास्ता नेई रखदे ते इंदे कन्नै अमरीकी सम्प्रभुता ते खुशहाली गी जोफ पुज्जी सकदा ऐ।

<><><><><><>

Badminton

बैडमिंटन च भारत दी पी.वी सिंधु होर कुआलाम्पुर च मलेशिया ओपन दे वुमन्स सिंगल दे क्वार्टरफाइनल च दाखल होई गेइयां ना। उनें अज्ज 16में राउंड च जपान दी तोमोको मियाजाकी गी हराया। हालांकि मेन्स सिंगलस कैटेगरी च अपने-अपने प्री क्वार्टर फाइनल मैचें च लक्ष्य सेन ते आयुश शेटी इस टूर्नामेंट थमां बाहर होई गे ना।

<><><><><><>

IMD-Weather

भारती मौसम विभाग नै अज्ज पंजाब, हरियाणा, चंडीगढ़, राजस्थान, दिल्ली, उत्तर प्रदेश ते बिहार च घनी थमां बड़ी मती घनी धुंध दी चेतावनी दिंदे होई ओरेंज अलर्ट जारी कीता ऐ। मौसम विभाग नै जम्मू-कश्मीर, लद्दाख, गिलगित, बाल्तीस्तान, मुजफ्फराबाद, हिमाचल प्रदेश, उत्तराखंड, उत्तर प्रदेश, पच्छमी राजस्थान, मध्य प्रदेश, बिहार, पच्छिम बंगाल ते पूर्वोत्तर राज्यें च औंदे दऊं दिनें च बड़ी घनी धुंध पौने दी पेशगोई कीती ऐ। विभाग नै दस्सेआ ऐ जे हिमाचल प्रदेश, पंजाब, हरियाणा, राजस्थान, छत्तीसगढ़, पूर्वी मध्य प्रदेश, दिल्ली, झारखंड ते ओडिशा च बी सीत लैहर दा प्रकोप जारी रौहने दी मेद दस्सी ऐ।

<><><><><><>